

Evening Dogri News Bulletin

10mth May 2025.1815

Headlines

- भारत ते पाकिस्तान नै तुरत प्रभाऽ कन्नै संघर्ष विराम लागू करने पर सैह्मति जताई ऐ। पाकिस्तान दे डीजीएमओ नै अपने भारती समकक्ष होरें'गी फोन करियै इस बारै गुजारिश कीती।
- प्रधानमंत्री नरेन्द्र मोदी होरें रक्षा मंत्री राजनाथ सिंह ते त्रौनें सेनाएं दे प्रमुखें कन्नै बैठक कीती।
- आपरेशन सिंदूर दे तैह्त् पाकिस्तान खलाफ भारत आसेआ कीती गेदी कार्रवाई च जैशे मोहम्मद ते लश्करे तैयाबा दे 5 सिरे दे आतंकवादी मारे गेदे न।
- मुख्मंत्री ओमर अब्दुल्ला होरें जम्मू च अज्ज बड्डलै होए दे धमाकें आह्ली थाहरें दा दौरा लाइयै प्रभावतें कन्नै गल्लबात कीती।
- रजौरी च पाकिस्तानी गोलाबारी च इक सरकारी अधिकारी दी मौत होई गई ऐ।

<><><><><><>

India Pak Ceasefire

भारत ते पाकिस्तान नै आपू'चै संघर्ष विराम दा सम्मान करने ते जारी तनोतनी ते फौजी कार्रवाईएं गी तुरत प्रभाऽ कन्नै रोकी देने दा फैसला लैता ऐ। विदेश मंत्रालय दे सचिव विक्रम मिसरी होरें हूनै शा किश चिरै पैह्ले मीडिया गी इस बारै जानकारी दिंदे होई दस्सेआ जे पाकिस्तान दे डीजीएमओ नै अपने भारती समकक्ष गी फोन करियै इस बारै च गुजारिश कीती। उ'नें दस्सेआ जे दौनें देसें इस गल्लै पर सैह्मति जताई ऐ जे अज्ज संझां 5 बजे थमां दौनें मुख्खें बश्कार संघर्ष विराम लागू करी दित्ता गेआ ऐ।

<><><><><><>

PM-Meeting

प्रधानमंत्री नरेन्द्र मोदी होरें अज्ज रक्षा मंत्री राजनाथ सिंह ते त्रौनें सेनाएं दे प्रमुखें कन्नै बैठक लाई। राश्ट्रीय सुरक्षा सलाहकार अजीत डोभाल होर बी बैठक च मजूद हे। पाकिस्तान खलाफ भारत दी जवाबी कारवाई गी दिक्खदे होई एह बैठक नमीं दिल्ली च प्रधानमंत्री हुंदे आवास पर होई।

<><><><><><>

India Attack(byte)

भारतीय सशस्त्र बलें पाकिस्तान की लगातार बध्दी ते भड़काऊ कारवाइएं दे परते च ओह्दे तकनीकी-बुनिसादी ढांचे, कमान ते नियंत्रण केन्द्र रडार साइट ते एमुनियशन डिपो पर सटीक हमले कीते। आपरेशन सिंदूर बारे विशेष जानकारी दिंदे होई कर्नल सोफिया कुरेशी होरें भारतीय सशस्त्र बलें आस्सेआ कीती गेदी कारवाई बारे दस्सेआ।

विंग कमांडर व्योमिला सिंह होरें भारतीय एस-400 ब्हाई रक्षा प्रणाली गी नश्ट करने, सूरतगढ़ ते सिरसा च ब्हाई क्षेत्रंग ी तबाह करने दे पाकिस्तान दे झूठे दावें गी खारज करी दित्ता। उनें इनें दावें गी बेबुनियाद दस्सदे होई इसी पाकिस्तान की झूठी खबरां फैलाने की इक साजश दस्सेआ। विदेश सचिव विक्रम मिसरी होरें आखेआ जे पाकिस्तान अपनी कारवाइएं कन्नै तनोतनी गी बधाने दा कम्म करा'रदा ऐ ते भारत बड़ेनपे-तुले तरीके कन्नै ओह्दी इनें भेड़ी हरकतें दा बनकदा परता देआ'रदा ऐ।

<><><><><><>

Jaish Terrorists Killed

भारत आस्सेआ आपरेशन सिंदूर रंभ कीते जाने मगरा पाकिस्तान च जेश-ए-मोहम्मद ते लश्करे तैयबा दे 5 आतंकवादी मारे गे न। सूत्रें मूजब इनें आतंकिएं च मुदस्सर खादियान खास उर्फ अबू जंदल मौलाना मसूद अजहर दा नेड़मा सरबंधी हाफिज मोहम्मद जीमल, मोहम्मद युसूफ अजहर, खालिद उर्फ अबू अकाशा ते मोहम्मद हसन खान शामिल न।

<><><><><><>

Media Advisory

सबबने मीडिया चैनलें ते डिजीटल प्लेटफार्में ते सोशल मीडिया दा इस्तेमाल करने आले आम लोकें गी बी सलाह दित्ती जंदी ऐ जे ओ फौजी कारवाइएं, सुरक्षा बलें की आओजाई ते इस चाल्ली दिएं गतिविधिएं दे वीडियो गी शेयर नेई करनकी जे इआं करने कन्नै महत्वपूर्ण अभियान प्रभावत होई सकदे न ते लोकें की जान गी खतरा होइ सकदा ऐ ते कारवाइएं पर बी असर पेई सकदा ऐ।

<><><><><><>

Fact Check

पाकिस्तान की कायराना हिमाकत पर भारत दा तगड़ेयाई आले परते नै बन्ने दे दूई बक्खी थमां गलत सूचनाएं च बाद्धा शुरू होई चुके दा ऐ। पाकिस्तान मीडिया ते जनता की घोषणा गी धोखा देने आस्तै नकली वीडियो ते बदली दिएं तस्वीरें दा पाकिस्तान आस्सेआ प्रसार कीता जा'रदा ऐ। लोकें गी आग्रह कीता जंदा ऐ जे ओह सबै जानकारी की तस्दीक करन ते कुसै बी संदिग्ध सामग्री की रिपोर्ट पीआईबी फैक्ट चेक गी मोबाइल नंबर 8799711259 पर व्हाट्स ऐप दे राएं जां फही socialmedia@pib.gov.in पर ईमेल दे राएं देन।

<><><><><><>

Helpline

जम्मू-कश्मीर दी सरकारै विद्यार्थिएं लेई खास तौर पर समर्पित हेल्पलाईनां स्थापित कीतीआं न। जम्मू-कश्मीर दे ओकड़े विद्यार्थी जेहड़े प्रदेश थमां बाहर पढ़ाई करै करदे न, ते ओह अपने घरें गी परतौना चांहदे न, उ'नेंगी सलाह दित्ती गई ऐ जे ओह जम्मू संभाग दे स्कूली शिक्षा विभाग ते ट्रांसपोर्ट विभाग दे अधिकारिएं कन्नै राबता करी सकदे न।

<><><><><><>

CM Visit

मुख्यमंत्री ओमर अब्दुल्ला संदिग्ध पाकिस्तानी ड्रोन जां शैल्ल करी होए दे धमाके च जम्मू शैहरा च क्षतिग्रस्त होए दे द'उं रिहायशी इलाकें दा दौरा लाया। इ'नें धमाकें करी इक घर ते केई सारी गडिडिएं गी नुकसान पुज्जा ऐ। आकाशवाणी जम्मू दे संवाददाता दी रिपोर्ट मूजब, जम्मू च अज्ज बड्डलै लोकें, धमाके ज्नेइयां तेज अवाजां सुनियां। पाकिस्तान आसेआ संदिग्ध ड्रोन हमलें ते गोलाबारी दे चलदे शैहरा च केई थाहरें पर सायरन बजाए गे। मुख्यमंत्री ओमर अब्दुल्ला होरें अज्ज रेहाड़ी ते रूप नगर इलाकें च धमाकें आहली थाहरें दा दौरा लाइयै प्रभावत परोआरें कन्नै गल्लबात कीती। रिहाड़ी च 4 लोक जख्मीं होए जिसलै के बनतलाब इलाके च इक महिला ते इक कुड़ी सने घट्टोघट्ट 3 जने जख्मीं होए दे न। रूप नगर इलाके च इक रिहायशी इमारत गी नुकसान पुज्जा ऐ।

<><><><><><>

CM Ex Gratia

मुख्यमंत्री ओमर अब्दुल्ला होरें हाल च बन्ने पारा आहली गोलाबारी च जान मुहाने आहलें दे परोआरें गी 10-10 लक्ख रुपें दी सींधीं सहायता देने दा ऐलान कीता ऐ। एह फैसला, सोगी परोआरें लेई इकजुटता ते मदाद दर्शाने दे मकसद कन्नै लैता गेआ ऐ। सरकार आसेआ नेह समें पर एह जतन कीते गे न जे प्रभावत इलाकें च लोकें दिऐं मुश्कलें गी घट्ट कीता जाई सकै। ओमर होरें बन्ने पारा आहली गोलाबारी दरान बेदोसे नागरिकें दी मौती पर दूंहगा दुक्ख जताया ऐ। उ'नें प्रभावत परोआरें गी हर लोड़चदी मदाद उपलब्ध करोआने दे अपने घेइये गी पक्का करदे होई सरबंघत अधिकारिएं गी एह निर्देश दित्ता जे ओह राहत ते आबादकारी आहली प्रक्रिया च तेजी आहनन।

<><><><><><>

J&K Killings

जम्मू-कश्मीर दे रजौरी, पुंछ ते जम्मू जिलें च अज्ज बड्डलै सवेला पाकिस्तान आसेआ कीती गेदी भारी गोलाबारी च इक वरिष्ठ सरकारी अधिकारी सने 5 लोकें दी मौत ते केई जनें जख्मीं होई गे। आकाशवाणी दे जम्मू

संवाददाता दी रिपोर्ट मूजब, रजौरी दे अतिरिक्त जिला विकास कमिशनर राज कुमार थापा ते उं'दे द'उं स्टॉफ मैम्बर उसलै गंभीर तौर पर जख्मीं होईं गे जिसलै अज्ज रजौरी कस्बे च पाकिस्तान दी तरफा दागेआ गेदा गोला उं'दी सरकारी रिहायशी इमारत उप्पर डिग्गा। उ'नेंगी तुरत रजौरी आहले सरकारी मेडिकल कॉलेज पुजाया गेआ जित्थे अतिरिक्त जिला विकास कमिशनर राज कुमार थापा होरें दम त्रोड़ी दित्ता। केन्द्री राज्यमंत्री डाक्टर जीतेन्द्र सिंह, लेफ्टिनेंट गवर्नर मनोज सिन्हा ते मुख्यमंत्री ओमर अब्दुल्ला होरें थापा हुं'दी मौती पर डूंहगा दुक्ख ते बसोस जताया ऐ। मुख्यमंत्री होरें थापा हुं'दे घर जाइयै उंदे परोआर दे सदस्यें कन्नै बसोस जताया।

<><><><><><>

Satish Essential Commodities

प्रदेश च बने दे मजूदा हालात दे मददेनजर, खुराक, सिविल सप्लाईज ते उपभोक्ता मामलें आहले मैहकमे दे मंत्री सतीश शर्मा होरें लोकें गी जकीन दोआया जे प्रदेश च जरूरी चीजें—बस्तें जि'आं अन्न—दाने, पेट्रोलियम उत्पादें ते एलजीपी वगैरा दी कोई कमी नेई ऐ। मंत्री होरें दस्सेआ जे सार्वजनिक बंडुड आहली सभ्मनें थाहरें पर सुद्दा भंडार उपलब्ध ऐ ते नियमित आपूर्ति जकीनी बनाने लेई सभ्मै लोड़चदे बंदोबस्त कीते गेदे न। मंत्री होरें जरूरी चीजें—बस्तें दी सप्लाई जकीनी बनाने च सैहयोग देने लेई ट्रेडर एसोसिएशनें ते फैंडरेशनें दा आभार जताया।

<><><><><><>

Govt Appreciation

जम्मू—कश्मीर दी सरकारै, हाल च होई दिएं घटनाएं दे मददेनजर लगातार सबर ते भरोसे दा परिचय देने लेई प्रदेश दे सभ्मनें बसनीकें दी सराहना कीती ऐ। सभ्मै लोड़चदे हीले कीते जा'रदे न ते सरकार कुसै बी हालात दा सामना करने लेई पूरी चाल्ली तैयार ऐ। सरकारै, आम लोकें गी गुजारिश कीती ऐ जे ओह सबर रक्खन ते बेवजह डर—त्राह च नेई औन। लोकें गी इब्बी आखेआ गेआ ऐ जे ओह एनडीएमए ते सरकार आसेआ जारी दिशा—निर्देशों दी पालमा जकीनी बनान। सोशल मीडिया पर गलत सूचनां ते फर्जी दावे, बेवजह डर—त्राह दे हालात पैदा करी सकदे न। बसनीकें गी सलाह दित्ती गई ऐ जे ओह अफवाहीं नेई फैलान ते छड़े विश्वसनी खबरें आहले चैनलें पर गै भरोसा करन।

<><><><><><>